

A wat elo, Här Meisch?

Mat groussen Erwaardungen huet den SNE/CGFP dem Educationnsminister Claude Meisch seng Presentatioun vu sengem « Rapport d'analyse » zur COVID-19 Situatioun an de Schoule während de 6 éischte Woche verfollegt.

Zu den annoncéesierten Adaptatioune gehéieren:

- D'Ordonnancë fir sech testen ze loosse ginn elo net méi vun der Santé mee vun der « Education nationale » un d'Eltere verdeelt. Wann dës Mesure derzou féiere géif, dass d'Prozedur elo méi séier a méi effikass gétt, da kann den SNE/CGFP dës Upassung vum Dispositif nëmmen ënnerstëtzen. An deem Kontext begréisst den SNE/CGFP et, dass elo enger vu senger Fuerderunge Rechnung gedroe gétt, an dass d'Schüler an d'Personal, déi vun engem Zenario 1 betraff sinn, kënnen an de Schoule selwer getest ginn. Déi mobil Teststatiounen, vun deenen den Educationnsminister am September geschwat huet, kommen also endlech an de Schoulen zum Asaz.
- Och wat d'Installatioun vun techneschen Hëllefsmëttel an de Schoulen ubelaangt, schéngt et zu enger Ouverture ze kommen. De Minister huet nämlech an der Radiosendung « Dir hutt d'Wuert » vum 13. 11. 2020 gesot, dass hie sech den Asaz vun CO2-Ampelen, déi d'Konzentratioun vun CO2 an der Loft moossen, an de Kllassesäll kéint virstellen. Et géllt elo Neel mat Käpp ze maachen. Et musse fir all Klassen esou séier wéi méiglech CO2-Ampelen bestallt an installéiert ginn. Den SNE/CGFP ass der Meenung, dass den Asaz vun dësen CO2-Ampelen zwar en éischte gudde Schrëtt an déi richteg Richtung ass, mee dass et domadder awer net duer geet. Den SNE/CGFP bleift bei senger Fuerderunge vu mobile Raumlufreiniger an de Kllassesäll a Féiwermoossapparater an all Schoulen.

Wéi et an der Pressekonferenz vum 17. 11. 2020 vum Premier Minister an der Gesondheitsministesch annoncéesiert gouf, kéint et eventuell och ab nächster Woch zu Moosname beim organiséesierte Sport kommen. Schwéier nozevollzéien ass et, dass esou Adaptatioune beim Veräinssport keen Afloss op de Schoulsport sollen hunn.

Am Fall wou de Gesetzesprojet zu den neie COVID-19-Restriktiounen d'nächst Woch an der Deputéiertekummer gestëmmt géif ginn, huet de Premier ukléngelooss, dass och an de Schoule verschidden nei Mesuren ageféiert kéinte ginn. Dës géifen awer keng Gesetzesadaptatiounen erfuerderen. Den Aussoe vum Educationnsminister an der Sendung « Kloertext » vum 19. 11. 2020 no, wäeren Upassungen awer nëmmen am « Enseignement secondaire » virgesinn. An de Grondschoole géifen d'Mesuren, senger Meenung no, duer goen. Den SNE/CGFP freet sech, ob dat wierklech de Fall ass, wann ee sech déi rezent Entwécklung vun de COVID-19-Fäll am « Enseignement fondamental » ukuckt. Misst een do net proaktiv verschidde Mesuren aféieren an

dat fir d'Kanner, d'Enseignanten an d'Betreiungspersonal beschtméiglech ze schützen. Den SNE/CGFP bedauert et op alle Fall, dass et nach ëmmer net zu engem richtegen Dialog tëschent dem Educatiounsministère an de Gewerkschaften aus dem « Enseignement fondamental » komm ass fir zesummen ze kucken, wéi een am beschten d'Infektiounen an de Schoule verhënneren an d'Personal schützen kann. Den SNE/CGFP ass op alle Fall net méi domadder d'accord, dass e vum Educatiounsminister kuerzfristeg iwwert Mesuren, déi geholl solle ginn, just informéiert gëtt a keng Méiglechkeet besteet, dass seng Vuë mat afléissen. Dat ass fir eis en « Dialogue de sourds » dee mir esou net méi acceptéiere wäerten.

Fir de Risiko, dass d'Schoule missten zougemaach ginn, ze minimiséieren, fuerdert den SNE/CGFP dass,

a) d'Zesummeleeë vu Klassen an d'Vermësche vu Kanner onbedéngt verhënnert muss ginn, well net genuch Remplaçanten zur Verfügung stinn.

Fir esou vill wéi méiglech Personal fir d'Schoulen an d'Aarbecht mat de Kanner ze generéieren, schwätzt den SNE/CGFP sech fir e Moratoire vun all Projeten, déi fir de Fonctionnement vun der Schoul net dréngend noutwendeg sinn, aus. Dat doduerch fräigesate Personal, wann et iwwert eng komplett Schoulmeeschteschausbildung verfüügt, kéint dann an de Schoulen agesat gi fir um Terrain bei Enkpäss ze hëllefen. D'Kompetenze vun dëse Leit ginn aktuell dréngendst an de Schoule gebraucht, besonnesch ënnert dem Aspekt, dass elo engem an aller Hetz rekrutéierten Ersatzpersonal d'Bildung vun eise Kanner uvertraut gëtt. Et kann dach net sinn, dass mir op komplett onqualifiziert Leit zeréckgräifen, ier mir all d'Méiglechkeete fir d'Schoul mat qualifiziertem Personal funktionéieren ze loossen, ausgeschöpft hunn. D'Qualitéit vum Unterrecht an d'Bildung vun eise Kanner muss absolutt Prioritéit hunn! Dat misst dem Här Meisch a senger Funktioun als Educatiounsminister dach och ganz uewen um Häerz leien!

b) d'Vermësche vu Kanner an de Betreuungsstrukture verhënnert gëtt.

An eisen Ae mécht ee systematescht Trenne vu Gruppe vu Kanner an der Schoul just Sënn, wann dëst och am non-formale Beräich gemaach gëtt. Mir kënnen Infektiounen an Infektiounskette besser verhënneren andeems kohärent Mesuren tëscht der formaler an der non-formaler Bildung « en place » gesat ginn. Dee Kuddelmuddel, wéi en am Abléck praktizéiert gëtt, ass sécherlech kontraproduktiv! Et kann net sinn, dass Kanner an der Schoul getrennt musse ginn an esoubal si de Fouss an den non-formale Beräich setzen, ass dëst net méi erfuerdert. Och virun deenen Diere bleift de Virus net stoen!

c) d'Bereetstelle vu genuch FFP2-Maske fir all Enseignant, wann hien déi gären hätt.

D'Kritikpunkten, déi den SNE/CGFP an der Vergaangenheet opgezielt huet, bleiwen nach ëmmer bestoen.

D'Informatiounen am Kader vun der Pandemie sinn nach ëmmer net kloer, net transparent, net allgemenggëlteg an dacks schwéier nozevollzéien.

Fakt ass, dass oft kontradiktoresch Informatiounen ënnert dem Personal zirkuléieren. Vun der Santé a vum Educatiounsministère kommen deelweis ënnerschiddlech Consignen. Den SNE/CGFP kann novollzéien, dass d'Santé an de MENJE verschidde Vuen hunn. En huet awer kee Verständnis derfir, dass et bei deem Kompetenzgerangel den Enseignant um Terrain, deen d'Mesuren ëmsetzen an de Schüler an Elteren erkläre muss, dee Leidtragenden ass.

Awer och vun enger Direktioun op déi aner sinn d'Aussoen an d'Consignen net ëmmer kohärent.

Et kann och net sinn, dass allgemeng gülteg Uweisungen, déi de MENJE fir d'ganzt Land opgestallt huet, jee no Regionaldirektioun ënnerschiddlech ugewant, interpretéiert oder esouguer ignoréiert ginn.

Des Weidere verléiert d'Politik all Glafwierdegkeet, wann d'Léierpersonal Decisiounen einfach net novollzéie kann.